

M158: Pilatus

0,1 Man sagit uon dutischer zungen
0,2 siv si unbetwungen
0,3 ze uogene herte
0,4 swer si dicke berte
0,5 si wrde wol zehe
0,6 als dem stale ir geschee
0,7 der mit sinem gezowe
0,8 uf dem anehowe
0,9 wrde gebouge
0,10 swi ihz gotouge
0,11 ih wil spannin minen sin
0,12 zo einer rede an der ih bin
0,13 ane gedhenet uil cranc
0,14 mac sih enthalden min gedank
0,15 unz ih si geenden
0,16 so weiz ih daz genenden
0,17 me tut dan maze
0,18 an sulhen anlaze
0,19 Ih grifen an den uollemunt
0,20 unde sterke minen funt
0,21 mit dem eristen sinne
0,22 der under vnde inne
0,23 so gewrzelet ist
0,24 wirt mir state vnde frist
0,25 ih gezvhe uz im einen
0,26 zo den fullestainen
0,27 so manigis sinnis uolleist
0,28 daz mir sin vnde geist
0,29 gemût werdent beide
0,30 e ih dar abe scheide
0,31 Der eriste sin is so getan
0,32 den ich ze fullemunde han
0,33 under di andren geleit
0,34 is irschrikket mit freuilheit
0,35 swenne ih neigen dar an
0,36 er ist allir sinne vane
0,37 ir zil vnde ir zeigen
0,38 ih ne mac sin niht gereichen

0,39 swi ih in lege unde
0,40 zo dem fullemunde
0,41 da komet doch also
0,42 er is mir wilen zeho
0,43 wilen is er mir eben
0,44 als in der hatt gegeben
0,45 der wunderlich heizet
0,46 vnde vmbekreizet
0,47 himel vnde erden
0,48 der liez den sin geworden
0,49 Der selbe sin der ist sin
0,50 der mir in gab di sint min
0,51 di ih dar abe han gezogen
0,52 ih bin gebougit vnde gebogen
0,53 baz dan ih were
0,54 ih spien mih ze sere
0,55 do ih di sinne beschiet
0,56 noh nentlozen ih mih niet
0,57 ih wil an miner maze donen
0,58 unz ih geweichen vnde gewonen
0,59 in dutischer zungen uor baz
0,60 si ist mir noh al ze laz
0,61 Anegin vnde ende
0,62 dinen geist mir sende
0,63 zo minem beginne
0,64 blib mit mir ðinne
0,65 unz ih der uz muge komen
0,66 diz mere daz ih han ūnomen
0,67 undih hie wil sagen
0,68 daz gescach in den tagen
0,69 do din svn wart geboren
0,70 uon einer frowen uz irkorn
0,71 di muter ist vnde maget
0,72 di mir ze mitter naht taget
0,73 vnde in vinsternisse luhtet
0,74 vnde min herze ir uōhtet
0,75 swenne ih irlechen
0,76 di mih heizet sprechen
0,77 so min zunge ist trocken
0,78 di mih so ih bocken
0,79 wider uf rihtet
0,80 di mih berihtet
0,81 swenne ih awegie gen
0,82 di mih heizet uf sten
0,83 swenne ih nider uallen
0,84 siv ist uns allen
0,85 komen ze heile
0,86 si hat uns uon dem seile

0,87 unser viende irlost
0,88 si ist uns allir dinge trost
0,89 In disem ellende
0,90 zo unsis libis ende
0,91 sal si uns gut ende sin
0,92 si hat dem waren sunne schin
0,93 uf der erden gwnnen
0,94 manen unde sunnen
0,95 di sterren si vbirblichit
0,96 ir kuscheit gelichet
0,97 der lylien an der wize
0,98 in der hellewize
0,99 is siv ein lidigeren
0,100 gwnden vnde seren
0,101 ein plaster vnde semfticheit
0,102 in der barmherzicheit
0,103 imer bereite
0,104 der uerleiten geleite
0,105 wider an di hulde
0,106 unde uon der schulde
0,107 wider an daz rehte
0,108 uon dem unrehte
0,109 wider an di gnade
0,110 uon der ungenade
0,111 ze r̥we vnde zewnne
0,112 uon judischem kunne
0,113 alse uon dorne geborn
0,114 ein reht rosa an dorn
0,115 Aller wibe blūme
0,116 ze lobe vnde ze r̥me
0,117 allir magide crone
0,118 gib mir ze lone
0,119 daz ih dih loben muze
0,120 wi turren mih di vūze
0,121 vor angisten tragen
0,122 daz ih ir lob wil sagen
0,123 di lob hat an ende
0,124 wi turren mine hende
0,125 ir lob scriben
0,126 di uor allen wiben
0,127 gesegent muz imer wesen
0,128 wi getar min mut ir lob lesen
0,129 wi getar min ouge ir lob sehen
0,130 daz ir gnaden ist geschen
0,131 wi tar ih daz kunden
0,132 sit [ich] uon den sunden
0,133 bin ein vnreine uaz
0,134 wi tar ih loben uor baz

0,135 di di des lobis ist so uol
0,136 daz ih durh einer naldin hol
0,137 einen olbent e brehte
0,138 e ih daz irdehte
0,139 daz si eine lobis hat
0,140 min sin mir gar widerstat
0,141 wand ih niemer ne mah
0,142 vbirluhten den tach
0,143 In der selben frowen
0,144 muze mir gezowen
0,145 daz ih eine rede enbinde
0,146 di ih uon ir kinde
0,147 an einem bûche las
0,148 ir sun ir uater was
0,149 e si in gewnne
0,150 er gescuf ir kunne
0,151 die sin gezalte
0,152 des himelis er walte
0,153 mensche an der erden
0,154 di er liez gwerden
0,155 den tot si ime taten
0,156 uon dem iz wart geraten
0,157 uon den ime der tot gescah
0,158 spriche ih alsiz der sprah
0,159 der iz uor gescriben hat
0,160 iz gescah durh der iuden rat
0,161 durch ir rat vndir bete
0,162 pylatus ime den tot tete
0,163 uon dem ist diz mere
0,164 wer pylatus were
0,165 vnde wi er wrde geborn
0,166 vnde wa er ze herren wart irkorn
0,167 vnde waz uon ime leidis quam
0,168 vnde wanne er den tot nam
0,169 lere ih alsich bin gelart
0,170 uon wem er geboren wart
0,171 is min erste begin
0,172 waz dar uz unde dar in
0,173 ist gwiset unde geleit
0,174 si also min arbeit
0,175 daz ih niet ne wende
0,176 e ih di rede geende
0,177 Svs uant ih an latine
0,178 ze megenze an dem rine
0,179 tyrus ein kuninc saz
0,180 sin gwalt greif uor baz
0,181 mase moyn und rin
0,182 di dri wazzer waren sin

0,183 di lant di dar umbe lagen
0,184 vnde di der lande plagen
0,185 nigen an sine gwalt
0,186 iz was daz merre teil walt
0,187 daz ime waz vndirtan
0,188 der herre mohte wol han
0,189 uische vnde wiltprat
0,190 dez quam er an den rat
0,191 daz er uf dem walde
0,192 ze legere vnde ze behalde
0,193 iagehus worhte
0,194 durh gemach vnde durh uorhte
0,195 beide durh gerête
0,196 daz er di tieste ouh hete
0,197 durh sine gwarheit
0,198 eines tagis er uz reit
0,199 iz ginc ime harte wol in hant
0,200 wildes er uil uant
0,201 an der abunt stunde
0,202 durh iegere unde durh hunde
0,203 bleib der kuninc tyrus
0,204 di naht in einem iagehus
0,205 Er unde sine gesellescaf
0,206 hete gute bereitscaf
0,207 beide wilt vnde zam
0,208 daz bette ime den tisch nam
0,209 é sinem rehte
0,210 den herren di knehte
0,211 betten begunden
0,212 binnen den stunden
0,213 tyrus uor di ture schreit
0,214 unz sin bette wrde bereit
0,215 iz was ein harte scone naht
0,216 der wint nehete neheine maht
0,217 groze noh cleine
0,218 der luft was reine
0,219 di truben wolken
0,220 waren gesolken
0,221 ouh ne heten di sterren
0,222 nierin neheinen werren
0,223 der himel was einfare
0,224 tyrus wart des gware
0,225 unde sahe daz gestirne an
0,226 er was ein uollencomen man
0,227 an astronomien
0,228 fursten vnde frien
0,229 edele lute wol geborn
0,230 heten di kunst uz irkorn

0,231 si was lieb bi der zit
0,232 also ist si da man ir noh phlit
0,233 Cyro was di list kunt
0,234 da er uor der ture stunt
0,235 begunder uf kaffen
0,236 di zit was so gescaffen
0,237 daz er an den sterren sah
0,238 swilhem wibe daz gescach
0,239 entfienc si in der zit ein kint
0,240 iz wrde harte listic sint
0,241 vnde solde witen in daz lant
0,242 sin name werden bekant
0,243 iz was vil spete
0,244 di frowen di er hite
0,245 di ne kunde zo den dingen
0,246 bezite njeman bringen
0,247 do ne beiter nwwit langer
0,248 di uon ime swanger
0,249 wrde bi der naht
0,250 alserz uor hete irdaht
0,251 hiez er suchen eine magit
0,252 er hetiz heimliche gesaget
0,253 sinen kamereren
0,254 er hiz si enwec keren
0,255 schiere unde balde
0,256 in dem wilden walde
0,257 uber berg unde vbir tal
0,258 suhten di boten vbir al
0,259 Si riten lange irre
0,260 beide an der uerre
0,261 vnde ouh an der nehe
0,262 é ir dichein gesehe
0,263 dorf oder funde
0,264 in einer unkunde
0,265 in einem grunde vil tief
0,266 da ein [...] bach lief
0,267 uon kranken geuelle
0,268 ein mulin gestelle
0,269 heten uonden di boten
0,270 einen mosehten koten
0,271 ein arm heimöte
0,272 si hete armvte
0,273 in di wstene getriben
0,274 di da wonten vnde bliben
0,275 waren ein krank gesinde
0,276 ein man mit sinem kinde
0,277 daz kint was ein scone magit
0,278 mir sint ir namen sus gesagit

0,279 atus hiez der man
0,280 di tohter di er gwan
0,281 di was geheizen pyla
0,282 di namen si da
0,283 Si brahten si tyro
0,284 da gescah ir also
0,285 alserz hete uor irsehen
0,286 sin wille was geschen
0,287 unde schire irgangen
0,288 si hete ein kint entfangen
0,289 des teter kunincliche
0,290 er machete si riche
0,291 wande si ime bi was gelegen
0,292 er hiez irn uater ir plegen
0,293 unde sagetim daz si ein kint truc
0,294 unde hiez ir spise geben genuc
0,295 vnde gab ir harte guten trost
0,296 swenne si wrde irlost
0,297 ob si eine tohter gwnne
0,298 si solde uze fursten kunne
0,299 einen richen fursten haben
0,300 vnde ob sie gwnne einen knaben
0,301 den bat er daz si wol zuge
0,302 diwile daz ir kint suge
0,303 Alser des sugis mohte enberen
0,304 er wolde si geweren
0,305 daz er in zo ime nene
0,306 vnde zuge alsiz gezeme
0,307 kuninlichem geslehte
0,308 pila tete rehte
0,309 alser bat vnde hiez
0,310 in der mulen er si liez
0,311 undiz quam an den tac
0,312 daz si des kindes gelac
0,313 si gwan einen sun wol getan
0,314 soldiz ime dar nah irgan
0,315 daz er was scone
0,316 so wrdime ein crone
0,317 vnde ein kunincriche
0,318 sin geschephede was so riche
0,319 Do pyla sin genas
0,320 ato uil liebe was
0,321 daz was dar ane schin
0,322 uon ime vnde uon der tohter sin
0,323 einen namen er nam
0,324 der uon in zwein quam
0,325 mit guter maze er in uant
0,326 si zwei waren genant

0,327 pila unde atus
0,328 des hiezen si in pylatus
0,329 der name was heimlich
0,330 durh di tohter vnde durh sih
0,331 vnde durh ir geslehte
0,332 irdahter in ze rehte
0,333 mit liebe mit guten hogen
0,334 di zvei den dritten zugen
0,335 unz an di stunde
0,336 daz er sih begunde
0,337 mit uōzen vnde mit henden
0,338 uersuchen an den wenden
0,339 an benken vnde an stūlen
0,340 alser begunde vōlen
0,341 daz er ir hete gwalt
0,342 des wart er freuil vnde balt
0,343 an loufe vnde an gange
0,344 dicke vnde also lange
0,345 vnzer ze rosse wart eben
0,346 do brahte atus sinen neben
0,347 ze megenze da sin uater saz
0,348 tyrus entfienc in deste baz
0,349 unde hete gut gedinge
0,350 zo dem jungelinge
0,351 Pylatus wol entfangen wart
0,352 er was gewassen vnde gekart
0,353 vnde in sulh aldir gerucht
0,354 daz er beide an di zucht
0,355 an pris unde an ere
0,356 mohte sin bekere
0,357 hin abe ʒ hie uone
0,358 mit sinem elichem svne
0,359 tyrus in so wol zoch
0,360 daz er dem bruder wart zehoch
0,361 an dem vbirmute
0,362 an gift vnde an gute
0,363 an gelubete vnde an sande
0,364 an voge vnde an gwande
0,365 an scone vnde an gelaze
0,366 mit grozer unmaze
0,367 vbirginc in sin craft
0,368 iezo hete sih behaft
0,369 under in beider sit
0,370 der clebere unde der greibe nit
0,371 der rehte sun pilatum neit
0,372 wander in vbirschreit
0,373 an allen den dingen
0,374 dī in uor mohten bringen

0,375 Pylatus hete zo ime haz
0,376 wander mohte uil baz
0,377 durh frunt vnde durh mage
0,378 des quam an di wage
0,379 disses tugint ienis gebort
0,380 vbil gedanc bose wort
0,381 waren ze gehe
0,382 unde scüfen daz di vehe
0,383 also lange dar under wac
0,384 unz der eine gelac
0,385 wandiz quam in kurzen tagen
0,386 daz si samint riten iagen
0,387 ze worten si quamen
0,388 ir knehtiz undirnamen
0,389 daz ne half doh niet
0,390 der edele nuwit entriet
0,391 pylatis manheit
0,392 wendir me mit ime reit
0,393 dan mit ienem tête
0,394 der di sterke hete
0,395 der widirstunt eine
0,396 den andren algemeine
0,397 Pylatus durh vmmut
0,398 ne ahtiz lib noh daz gut
0,399 dem brudere er den lib nam
0,400 vnde alsiz an den uater quam
0,401 wi iz comen were
0,402 er irscrah harte sere
0,403 ime was uil leide
0,404 durh di sune beide
0,405 alsiz wol uz irschal
0,406 si rieten tyro ubir al
0,407 daz er pilato tete
0,408 den tot den er hete
0,409 sinem brudere getan
0,410 er sprah “nein ih wil han
0,411 den namen daz ih uater si
0,412 ih denke einis andren da bi
0,413 tote ih disen unde is iener tot
0,414 so houfe ih not ubir not
0,415 vnde bin uon zvein scaden
0,416 deste swerer irladen
0,417 her horet zv andir rat
0,418 iulius cesar der hat
0,419 bedwngen alle di lant
0,420 unde hat di fursten besant
0,421 vnde enboten in algliche
0,422 daz si romischem riche

0,423 vnde ime sin vndirtan
0,424 des wil er gisel uon uns han
0,425 Diz wil iulius cesar
0,426 ih ne mac noh ne tar
0,427 ime nuwit widirstreben
0,428 des muz ih ime gisel geben
0,429 pylatus sol ð gisel sin
0,430 sus behaldih daz kint min
0,431 vnde des keiseris hulde
0,432 umbe di gesculde”
0,433 daz er wol irdahte
0,434 pylatum man brahte
0,435 ze rome alser was gesant
0,436 fursten sune er da uant
0,437 manigen sconen iungelinc
0,438 di umbe di selbe dinc
0,439 ze rome waren comen
0,440 der hete sih einer uor genomen
0,441 uon allir hande hubischeit
0,442 an sterke unde an wisheit
0,443 der keiser sin wol plegen liez
0,444 paynus der gisel hiez
0,445 ir nehein ne was sin gliche
0,446 in hete uon frankriche
0,447 sin uater zi gisele gesant dar
0,448 alse geboten hete cesar
0,449 Paynus nam sih uore
0,450 er hete wnsch vnde kore
0,451 under in allen
0,452 er mohte wol geuallen
0,453 uon libe uon lobe
0,454 in des keiseris hobe
0,455 pylatus sih ouh uor nam
0,456 unzer kriechend quam
0,457 an eine snode ere
0,458 di dwanc er also sere
0,459 unzer si uf baz getreib
0,460 niet lange er dar inne bleib
0,461 er steich hoer ein teil
0,462 di wile breite sih sin heil
0,463 des quam er uorbaz
0,464 also lange treib er daz
0,465 unzer dar was gestigen
0,466 da erz glich begunde wigen
0,467 mit herren payno
0,468 ze iungist quam er also ho
0,469 daz paynis geswigit wart
0,470 pylatus h[...] in hart

0,471 unzer gwan sulhen namen
0,472 daz *her sih sin* muste scamen
0,473 Den biderben man *hazzet*
0,474 swen er di tugint uazzet
0,475 pylato also gescah
0,476 payno was ungemach
0,477 daz er sulh lob hete
0,478 nit vnde ungerete
0,479 hub sih undir in zvein
0,480 si wolden zesamene vbir ein
0,481 also langiz sih getruc
0,482 unz pylatus in ersluc
0,483 daz was den uon rome leit
0,484 durh ir beider frumicheit
0,485 si sprachen al gliche
0,486 daz der kuninc uon frankriche
0,487 sin dienist solde keren
0,488 uon den romeren
0,489 unde daz er solde clagen
0,490 daz sin svn were irslagen
0,491 in fride unde in truwen
0,492 si begunden payn ruwen
0,493 manige rede si taten
0,494 doh wart da geraten
0,495 pylatus hete den tot uerscûlt
0,496 da were reht an ime iruolt
0,497 do entlinen si dem rehte
0,498 si uorhten sin geslehte
0,499 vnde tutisch uolk mere
0,500 dan di karlingere
0,501 Si wrfen iz here unde dare
0,502 wenne weme oder ware
0,503 pylatum si uersenten
0,504 wa si ein uolk irkenten
0,505 so herte vnde so vneben
0,506 da er uerlure daz leben
0,507 do irdahten si ein lant
0,508 daz was pontus genant
0,509 uon rome harte uerre
0,510 strit unde werre
0,511 was da naht vnde tac
0,512 in einem gebirge daz lant lac
0,513 in einem vngeuerte
0,514 daz uolk was so herte
0,515 iz en wart nie keiser so stark
0,516 noh so swinde noh so ark
0,517 di sih daz an zohte
0,518 daz er si bedwingen mohte

0,519 durh angist vnde durh note
0,520 in di geinote
0,521 pylatum si brachten
0,522 wande si daz irdahten
0,523 mohter si bedwingen
0,524 mit dicheinen dingen
0,525 daz sis heten ere
0,526 unde dahten noh mere
0,527 ob er da blibe tot
0,528 daz si an groze not
0,529 got gelideget hete
0,530 gut was ir gerete
0,531 Si santen uffe sulh bescheit
0,532 ob siner manheit
0,533 ze pontos gelunge
0,534 daz er si bedwngē
0,535 daz si in wrden zinshaft
0,536 si wisten daz siner craft
0,537 njet ne kunde uorbestan
0,538 daz iz durh gut were getan
0,539 wanete der iungelinc
0,540 manlichen erz ane vienc
0,541 vnde uōr in ellende
0,542 balt unde behende
0,543 wol geringe vnde gerat
0,544 er was gwassen an di stat
0,545 daz er wol wiste
0,546 gut vnde argeliste
0,547 er was swinde unde lōs
0,548 des quam er ze pontos
0,549 pilatus unde sin here
0,550 uon rome v̄re vbir mere
0,551 da was er also lange
0,552 unz uon sinem gedwange
0,553 unde uon siner freuilheit
0,554 des uolkis herticheit
0,555 uil gebouge wart
0,556 er was hart wider hart
0,557 da er ze grozze sterke vant
0,558 mit gifte er si vbirwant
0,559 Dit drowe mit bete
0,560 mit gelubede er tete
0,561 daz er gwaldicliche saz
0,562 do treib er si uor baz
0,563 er wart in so swinde
0,564 daz di muter mit dem kinde
0,565 vnde de uater da mite
0,566 irbibeten sine unsite

0,567 also sere er si dwanc
0,568 daz sin ougewanc
0,569 vnde sin vinger gebot
0,570 an ir lib unde an ir tot
0,571 er gescuf in kurzen iaren
0,572 daz si vndertanic waren
0,573 an di romische gewalt
0,574 harde snel vnde balt
0,575 flouc ze rome dat mere
0,576 wi deme dinge were
0,577 si froweten sih is in rihte
0,578 durh zviualt geschihte
0,579 daz er unde sin maht
0,580 also uerre waz gestraht
0,581 daz mere quam witen
0,582 iz quam in den ziten
0,583 ze iudeam in daz lant
0,584 daz cristus unser heilant
0,585 geborn wart uon einer magit
0,586 uon dem ih uor han gesagit
0,587 Des landes kuninc herodes
0,588 irhorte daz mere undir des
0,589 daz her pylatus
0,590 di uon pontos alsus
0,591 hoe hete vbirstigen
0,592 unde daz si an sine wort nigen
0,593 des dahter daz der furste
0,594 wnder tvn torste
0,595 wandiz groz wndir was
0,596 daz pylatus da genas
0,597 unde daz nie nehein man
0,598 sulhen gewalt da gwan
0,599 wen er allis eine
0,600 daz enduhte ime nwwit cleine
0,601 wandiz was ein groz tat
0,602 herodes quam zu den rat
0,603 er woldin besenden
0,604 vnde wolde mit ime verenden
0,605 harte vil sinis fromen
0,606 er was uon fremeden lande comen
0,607 in daz lant ze iudea
0,608 er hete ein uolk uonden da
0,609 herte unde ungebouge
0,610 ze strite vnde ze urlouge
0,611 uil freislich unde ark
0,612 di iuden weren so stark
0,613 unde so mulich unde so drete
0,614 daz er angist hete

0,615 daz si infreuilliche
0,616 uon deme riche
0,617 gar uertriben solden
0,618 swenne so si wolden
0,619 *dannin* abe was sin gedanc
0,620 manige zit uil lanc
0,621 wi er di *iuden* [...] (.)